

NO. SOALAN: 65

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN HAJI KHALID BIN ABDUL SAMAD
[SHAH ALAM]**

TARIKH : 31 MAC 2015

RUJUKAN : 7593

SOALAN:

**Tuan Haji Khalid bin Abdul Samad [Shah Alam] minta MENTERI
DALAM NEGERI menyatakan apakah tindakan-tindakan yang telah
dan bakal diambil oleh pihak Kerajaan ke atas Laporan Suruhanjaya
Siasatan Pendatang Asing di Sabah.**

JAWAPAN:

Tuan yang di-Pertua,

Seperti mana yang dimaklumi, Seri Paduka Baginda Yang di-Pertuan Agong telah memperkenankan penubuhan Suruhanjaya Siasatan Pemandang Asing di Sabah menurut Seksyen 2(1)(d) dan Seksyen 3(1) Akta Suruhanjaya Siasatan 1950 pada 6 September 2012 dan menetapkan lapan (8) Terma Rujukan bagi Suruhanjaya ini. Seterusnya ketelusan Kerajaan juga dapat dilihat melalui keputusan Jemaah Menteri yang telah bersetuju supaya hasil siasatan dan laporan Suruhanjaya ini diumumkan kepada orang ramai dan ia juga telah dilaksanakan pada 03 Disember 2014 melalui Sidang Media oleh YBhg. Tan Sri Ketua Setiausaha Negara.

Bagi memastikan tindakan susulan diambil hasil terhadap syor dan laporan Suruhanjaya ini, maka Kerajaan telah bersetuju untuk menubuhkan Jawatankuasa Pengurusan Warga Asing di Sabah. Dalam memuktamadkan fungsi dan peranan Jawatankuasa ini, beberapa siri perbincangan dan tindakan penyelarasan telah diadakan dengan Kerajaan Negeri Sabah termasuklah agensi Kerajaan yang terlibat dalam urusan penguatkuasaan seperti Jabatan Pendaftaran Negara dan Jabatan Imigresen Malaysia. Jawatankuasa ini mempunyai struktur dua (2) tier iaitu :

- a) **Jawatankuasa Induk Pengurusan Warga Asing di Sabah yang dipengerusikan bersama oleh YAB Ketua Menteri Sabah dan YB Menteri Dalam Negeri yang antara lainnya diberi tanggungjawab untuk menggubal dasar dan strategi pendekatan pengurusan warga asing di Sabah serta memantau pelaksanaan dasar dan program oleh agensi yang berkaitan berhubungan pengurusan warga asing ini. Jawatankuasa ini juga telah mengadakan mesyuaratnya yang terkini pada 10 Februari 2015; dan**
- b) **Jawatankuasa Teknikal Pengurusan Warga Asing di Sabah yang dipengerusikan oleh YB Tan Sri Datuk Seri Panglima Joseph Pairin Kitingan, Timbalan Ketua Menteri Sabah. Jawatankuasa ini antara lainnya diberi tanggungjawab untuk meneliti laporan dan dapatan Suruhanjaya Siasatan dan mengemukakan cadangan penambahbaikan terhadap pengurusan warga asing di Sabah, mengkaji pelaksanaan sedia ada pengurusan warga asing di Sabah, mendapatkan maklum balas daripada masyarakat Sabah berhubung penambahbaikan pengurusan warga asing di Sabah, mengemukakan syor ke atas status keberadaan warga asing di Sabah mengikut undang-undang dan peraturan dan seterusnya mencadangkan pelan tindakan bagi pengurusan warga asing di Sabah. Jawatankuasa ini juga telah mengadakan mesyuaratnya yang terkini pada 17 Februari 2015.**

Tuan Yang di-Pertua,

Perlu diambil maklum bahawa Kerajaan mempunyai keazaman dan komitmen yang tinggi untuk mencari penyelesaian bagi masalah ini secara menyeluruh dan berterusan. Bahkan sebelum laporan Suruhanjaya disiapkan lagi, Kerajaan telah dan sedang melaksanakan tindakan-tindakan berkaitan beberapa perkara yang disentuh oleh Suruhanjaya termasuklah penubuhan Eastern Sabah Security Command (ESSCOM) yang berperanan memantapkan keselamatan dan kedaulatan negara daripada kumpulan-kumpulan yang mengancam keselamatan negeri Sabah serta melaksanakan dan meningkatkan operasi bersepadu mengusir pendatang asing tanpa izin.

Selaras dengan tanggungjawab yang telah diberikan kepada Jawatankuasa ini maka Kerajaan terbuka untuk menerima cadangan-cadangan baru untuk menyelesaikan isu warga asing termasuklah masalah kebanjiran Pendatang Asing Tanpa Izin di Sabah dan ia bolehlah dikemukakan melalui Jawatankuasa Teknikal Pengurusan Warga Asing di Sabah yang diketuai oleh YB Tan Sri Datuk Seri Panglima Joseph Pairin Kitingan, Timbalan Ketua Menteri Sabah.

Kerajaan juga amat berharap agar dengan tindakan-tindakan susulan yang sedang diambil oleh Jawatankuasa ini, isu mengenai pendatang asing di Sabah tidak lagi dipolemikkan. Kerajaan ingin menumpukan segala perhatian ke hadapan (way

***forward*) dalam menyelesaikan isu pendatang asing di Sabah ini dan menjadikan dapatan Suruhanjaya sebagai panduan dan rujukan utama.**

NO. SOALAN: 66

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN IDRIS BIN HAJI AHMAD
[BUKIT GANTANG]**

RUJUKAN : 7594

TARIKH : 31 MAC 2015

SOALAN:

**Tuan Idris bin Haji Ahmad [Bukit Gantang] minta MENTERI
DALAM NEGERI menyatakan apakah tujuan hukuman penjara untuk
memberi keinsafan kepada banduan, berapakah bilangan banduan
yang dipenjara semula sejak tahun 2000 hingga 2014.**

JAWAPAN:

Tuan Yang di-Pertua,

Untuk makluman Ahli Yang Berhormat, hukuman pemenjaraan bukan semata-mata untuk menghukum mereka yang telah melakukan kesalahan tetapi ianya bertujuan memberi keinsafan, membangunkan serta melengkapkan diri dari segi disiplin, sahsiah, keagamaan, kemahiran dan pengetahuan bagi memulakan kehidupan baru apabila dibebaskan kelak.

Pelbagai program latihan dan pemulihan telah dilaksanakan oleh Jabatan Penjara Malaysia di dalam dan di luar penjara. Keberkesanan pemulihan yang diberikan kepada banduan memainkan peranan penting untuk mengurangkan lagi kadar kemasukan semula banduan yang telah dibebaskan ke penjara.

Berasaskan formula pengiraan kemasukan semula (residivis) yang ditetapkan oleh pakar dan ahli akademik, kadar kemasukan semula penghuni (residivis) ke dalam penjara berada di bawah 9 peratus. Penambahbaikan pemulihan serta program pemulihan di luar penjara seperti sistem parol, rumah perantaraan, Pusat Pemulihan Pemasarakatan dan Perintah Kehadiran Wajib yang mula dilaksanakan secara aktif mulai tahun 2009 menjadi penyumbang utama kepada penurunan kadar residivis berkenaan.

Sehubungan itu, Jabatan Penjara terus berusaha untuk meningkatkan lagi keberkesanan program pemulihan serta turut melaksanakan pengkategorian penjara berasaskan kesalahan banduan dan kesesuaian bentuk pemulihan.

Untuk makluman Ahli Yang Berhormat juga, dari tahun 2003 hingga 2013, terdapat seramai 121,994 bekas banduan yang dipenjara semula, manakala seramai 663,080 banduan dibebaskan dalam tempoh yang sama.

Jabatan Penjara Malaysia mendapat pengiktirafan terutamanya dalam bentuk penyediaan perancangan pemulihan penghuni di peringkat antarabangsa, antaranya dari *Asian and Pasific Conference of Correctional Administrator (APCCA)*, *International Corrections and Prisons Association* dan termasuklah dari *Working Group on Arbitrary Detention (WGAD)* Bangsa-Bangsa Bersatu yang telah melawat dan memeriksa penjara-penjara di Malaysia. Program pemulihan Jabatan Penjara Malaysia turut dijadikan kursus di bawah program *Malaysia Technical Cooperation Program (MTCP)* untuk peserta-peserta dari institusi koreksional di serantau Asia Pasifik.